

養園騰稿

四明張氏約園開雕

序

養園先生以庚午七月卒義寧陳散原既爲之傳稱道先生按試廣信呼名有應以楊宗簡者詢而識爲鄉賢慈湖先生苗裔由是得慈湖墓於貴溪之羅塘引爲至快先生亦嘗以此語壽鏞云慈湖大儒也其將葬門人建昌傅正夫訪真西山求銘西山曰不敢或使序其梗概而表於墓門其責差輕而可勉壽鏞何能望西山萬一顧自甲申與仲弟壽鎬始師事先生以迄易簣啓手足先後凡四十七年昌黎所謂移時則必有合合必兩

養園集序

一

四明叢書

約園刊本

忘其所趨久然後去者非邪先生少先君子十歲同居詞館序寸草廬贈言謂官京師寓廬咫尺朝夕過從無虛日生平風義在師友間相見必商榷文字時或彼此互述世德紀實也蓋先生爲荅州觀察仲子家學淵源其來有自乙酉督學四川才三十一歲耳歲餘遭觀察喪去官辛卯復督學江西乙未任滿假歸時浙省猶未有學堂也先生開風氣先爲之物色教師爲之籌畫常費爲之建築講舍名稱屢易事實不更今南郊寧波中學是也先生撰陳氏翰香學校記曾及之當乙巳之秋

萍鄉喻公兆蕃爲吾郡太守汲汲興學有志改革張讓
三丈與壽鏞倡廢書院之議毛价臣奔走最力至臥不
貼席病而出淚一時陳杞懷陳慥夫馮汲蒙孫表卿最
爲同調然科舉尙未停也和之者衆而墨守舊說者亦
復不鮮先生周旋於新舊之間苦心孤詣一日集會至
涕泣以道嘗與壽鏞書謂吾郡晦塞已久值瓜熟蒂落
之日猶不能放手辦事開此十里霧自當屬之願大力
大之人某何足比數此雖先生之自謙而一時融化之
不易於斯見矣晚歲居滬瀆翹然物表學養益粹每談
朝章國故娓娓動人遇國家有大變故必憂形於色鄉
之大事更未嘗稍去於懷其尤盡力者在寧波和豐紗
廠散原所謂利民生而便工商資無不集事無不舉者
此其一也嗚呼人生有涯少年一得志睥睨斯世舉無
足動其心環而待我若士若農若工商漠然如秦越比
惟身家子孫謀者皆是也聞先生之風亦可以少媿矣
先生爲文不自收拾多散佚旣沒壽鏞與詰嗣在琨同
孫叔衡序祖燕方言宜哀輯其僅存者公諸世不幸同
孫序祖相繼卒在琨叔衡燕方輯成示壽鏞因付剞劂

彙中如上諮議局書上浙江巡按使書述中校緣起記
中校建築始末倉基陳氏翰香學校記皆犖犖大者昔
錢公桂森稱之曰歐曾之亞今讀其彙益信先生慕仰
慈湖者也慈湖以忘富貴利達勸西山先生於仲弟之
亡輓之曰空消受十年仕宦最難忘兩家淵源今壽鏞
學無所成獨後死耳幸得優游歲月埋首文字聞於先
生之學竊聞一二序其梗概固弟子之責也而吾郡學
風之由肇得考而知之民國二十六年一月受業張壽
鏞序

前江西學政翰林院編修盛君家傳

義寧陳三立撰

鎮海盛君省傳諱炳緯湖北安襄鄖荆兵備道諱植型次子也兵備公清節循政播聞中外維君繩前烈益發名於時天質挺異生十歲卽以善屬文應郡試號爲聖童兵備公官吏部從肄業國子監司業錢公桂森見其試列高等文稱曰歐曾之遺也歸補縣學生光緒己卯舉鄉試庚辰成進士選庶吉士授編修時君聲名籍甚顧不務徵逐競聲氣日求書海王村累十餘萬卷夙夜

藝園叢書

家傳

一四明叢書
藝園叢書

披誦泊如也乙酉奉命督學四川君至察使署吏胥類與就試士巧質射利學使者亦相沿納其例進曰陋規坐是弊藪牢結不可拔君立予禁斷風趨爲一變歲餘遭兵備公喪去官服除復督學江西甲午鄉試代巡撫爲監臨江西當宋明之際人文稱最盛今愈衰歎矣運會致然耶抑培才無其具耶君以南昌經訓書院依樸學課士績頗著於是按試所至就郡縣選高才生百數十人入與共學並蠲所藏書三萬卷置其中講習漸摩所成才益眾君以母太夫人春秋高受代乞歸養尋浙

撫承詔舉賢才首以君應謝不赴及太夫人年登八十始卒君鄉居已十五年世變亦益極遂不復出朝廷既採用新法趣立學海內嚮風君曰既棄跡於國當陳力於鄉首創設寧波儲才學堂後爲中學堂新建舍宇規制宏壯爲浙中諸校冠又籌增縣鯤池書院廩給與設備之費又設縣中學堂皆君辛苦奔走糾資累鉅萬成之言教育者翕然歸心焉全浙學務公所立推君爲之長雖避不居其名而維繫贊助無不至以故披猖之說醫陵一逞之習猶得君樹之鵠而陰救其弊他若通

航造軌振災恤患利民生而便工商者爲君所號召資無不集事無不舉惠澤之所被遠矣晚歲居滬瀆超然物表隱几寤歌以全其真庚午七月卒享年七十有六配王夫人生子在現同孫叔衡繼配王夫人生子序祖燕方墓在鄞西南鄉柴家山之麓

陳三立曰君以承明著作之才前後奉使持衡兩州於造士得人可謂有勞矣退居猶汲汲務興學終始不貳其精魂所淬厲何如哉聞諸鄉父老君之按試廣信也坐堂皇按籍呼名有應以楊宗簡者君心動詢而識爲

鄉賢慈湖先生苗裔由是得先生墓於貴溪之羅塘大
喜過望引爲平生所至快雅量高致爲想見之焉

養園臚彙目錄

卷一文

蛟川詩繫序

上諮議局書

趙母馮太恭人哀辭

上浙江巡按使書

老友慈谿王君煥文七十壽序

述中校緣起

記中校建築始末

養園臚彙目錄

一四明藏書
一初園刊本

題孫子授年文畫冊

張氏寸草廬贈言序

嚴筱舫先生事蹟傳信錄序

勤稼別墅記

猶子蘭孫五十贈言

上海四明醫院記

祭清誥授建威將軍浙江提督軍門呂公道生文

甬上青石張氏家譜序

卷二文

外舅王海帆先生德配外姑謝夫人七十壽言

甌海觀政錄序

黃母朱太夫人八十壽序

題鎮海向氏先世畫像

茗香館詩草序

謝節婦家傳

傅曉春先生家傳

何旭蕉先生家傳

題謝母王太夫人遺像

養廉堂自錄

藤雪樓詩鈔序

莫伯兄醉六文

上虞經氏族譜序

炳桂經君家傳

童小橋先生遺藁序

周星北六十壽序

虞君澄齋墓表

莫從弟竹書文

題孫文愨公書客座私祝

題孫文愨公山水畫卷

題孫文愨公書楹聯

倉基陳氏翰香學校記

陳季生君家傳

卷三 詩

題施丈雪舫採芝圖小影二首

代伯兄醉六挽林雪帆親家四首

挽金翁鏡芙二首

壽江年嫂王夫人七十

養園集目錄

壽趙姻嫂裘夫人七十二首

和張鎮峯五世稀古詠四首

張公權之尊人潤之先生暨德儷劉夫人六秩雙

壽

壽周个亭五十

題賀棗唐僧裝趺坐圖二首

節孝張母馮淑人七十壽四首

沈君燮臣爲子納婦翌日爲母楊太夫人稱觴祝

七秩壽賦此奉賀

壽陳少石同年

陳君琴胎八十壽

壽李寶裕七十

壽詹母鄭太夫人八十

題明遺獻辛克羽先生遺像

謝君蘅牕於梅墟故鄉勗設求精學校已屆廿載

賦此以紀

挽費冕卿

洪潛菊先生暨德儷鄭夫人七秩壽

壽園叢書目錄

四明叢書約圖刊本

壽趙芝室五十

壽魏伯楨五十

壽馮保魯八十

壽陳星白七十

張仲玉廳長出示先德蘿薌先生小瀛洲圖囑題

率成二絕以應

挽洪復老

題盛蔚堂知事松亭餞別圖二首

林孟垂世講五卜初度四首

挽俞雲蓀

題袁履登白首娛親圖二首

題徐仲麟課子圖

壽蔣東初六十

袁燮元先生八秩弧慶暨德儷胡夫人六十雙壽

挽董淡生

挽陳子秀三首

挽謝母王太夫人二首

壽徐積夫七十

卷四 目錄

五四明叢書

約園刊本

朱姻嫂汪太夫人七十輓旦

題黃涵之道尹先德春甫先生遺照二首

壽謝蘅牕五十四首

壽陳蓉館五十

洪君滄亭示余三茅十景詩紀賦此以志嚮往二

首

挽嚴漁三四首

挽張子淵親家四首

翰香學校新校舍落成兼祝陳稻笠先生百齡誕

辰紀念

壽周星北六十二首

廣瑤許先生暨德儷楊夫人百四十歲雙慶

卷四
目錄

六八
四明叢書
續編刊本

養園臚彙卷一

鎮海盛炳緯自傳著

蛟川詩繫序

鄉先輩復莊姚先生詩古文詞刊行已久晚歲輯有蛟川詩繫一書凡三十有一卷蒐采自隋唐迄清嘉道朝本邑詩家凡三百四十五人各選詩數首或數十首並人繫以傳敘述事蹟藉存梗概書成藏於家歲乙未余得自先生後人見原彙皆先生手書行草閒雜篆古密行細字讎校非易儲之篋衍久矣老友范君柳堂見之

養園臚彙卷一

一四明叢書

約園刊本

願任讎校乃延之至家兩閱寒暑始得竣事吾邑介居海滄自歐化內漸風雅之道亦稍稍陵夷矣後生小子目不睹先哲遺著烏知夫千百年來鄉先生文采風流如斯之盛賴姚先生此編網羅散失闡發幽光俾鄉邦文獻之傳藉茲不墜不大幸歟炳緯馬齒加長抱此遺編儻遂放失使作者之精神與姚先生纂輯之苦心自我而湮沒則獲戾滋大適監造縣中學校落成尙有餘貲爰亟付手民排印期傳永久印成乃書其緣起如此

上諮議局書

竊論我國戶口繁庶何嘗無財自庚子北方拳亂鑄成鐵錯使我二十一行省安分良民歲輸五千萬償款流入外洋各布政司又鑄行不許完糧不准納稅之銅元巧取民財數達千萬於是百姓母財爲之一空而市面恐慌之現象以成嗚呼誰生厲階忍以此爲吾商人罪耶上海爲我國金融總匯首受影響九月初旬遂有原豐潤大匯號停閉一事查我國習慣辦法凡商號官私存款遇有失事先清官款再理民欠源豐潤事同一律故各布政司各關道追索款項不畱餘地視爲當然顧

愚獨以爲此在閉關時代專制政體利源無外溢之嫌良懦無走險之慮猶可言耳今則預備立憲之詔旨彰彰在人耳目且新政繁興無一不借資民力若沿襲不變專以官權爲足恃於官款務必取盈而民欠可置之不論非獨向隅者吞聲飲泣情豈能甘且使百姓心目中知君民之地位懸絕官私之界域截然一旦國用告匱孰肯出其私財爲不關痛癢之官家盡茲義務據最近調查兩月以來滬上洋商如匯豐麥加利德華道勝荷蘭正金各銀行驟添存款四千萬元有某省人匯銀

元二十萬至麥加利該行拒而不納輾轉關說願廢息以活存計算始允兌收夫此四千萬元者皆我商號之所資以周轉洋行多一金之充積卽內地少一金之流通願吾商民竟忍而出此者誠念中國商號及戶部交通通商等官銀行皆官款所集官權所在儻有差池民受摧抑不逮外國銀行之平等相視耳夫當此民窮財盡之秋因司牧者但知有官不知有民至於爲淵酌魚爲叢毆雀而曾不少悔民心益離民氣益激國計必日益窘國勢亦日益危此真可痛哭流涕者矣夫不有民

何有國見小利則人事不成聖人之所切戒故愚以爲今日理財之道非發明君民一體之宗旨實行上下相維之政策殆不足以固人心而維國脈昔年頒布之破產律第四十條似未便因部臣爭執闕而不行應請貴局列入議案咨呈資政院從速核議凡商號虧欠官私各款應責令號主將財產和盤託出毋得隱匿俟彙集成數無分官私按成分派官不獨厚民不偏枯雖於公家稍似虧損然俾百姓曉然於憲政之利益君民一體得沾二百數十年來曠蕩未有之恩施庶幾急公好義

之心不擊而自動吾四百兆血氣之倫方將同心戮力以匡王室何必府庫之財乃其財乎萃已渙之人心儲不匱之財源鞏無疆之國祚胥在於此卽外國銀行之漏卮亦不期塞而自塞矣吾浙西有蠶桑之利東擅海產之饒爲商務極重要之地若民氣久鬱公理未伸投資必懷疑懼貨賄安望流通且東南民俗與洋人狎習日久顧而之他勢本甚便異日銖寸之遺皆非我有是豈朝廷之福故願早爲之所而有以挽救之也芻見所及是否有當伏候詳擇施行

趙母馮太恭人哀辭

光緒二十四年九月二十有七日慈谿趙茂才家荃之生母馮太恭人終於郡城居第春秋五十有六家荃擗踊呼搶哀感行路炳緯旣就喪次慰唁家荃乃泣而言曰家荃不肖不足繼述先人屢試省闈復不獲邀世俗之榮以娛堂上今吾母已矣獨念平生懿嫻閎而弗彰恐從此無徵則不孝之罪滋大敢述一二以告吾子先生妣年始十五歸我先考府君逮事先王父通奉公先王母秦太夫人隨先妣沈太夫人侍奉庭闈絜治脩禮

八十餘年先王母性方嚴舉家惕息惟恐忤意先生妣先意承旨務得歡心以此先考甚倚之比先王父母先後棄養先考猝遭風疾起居造次需人調護沈太夫人年既高先生妣乃躬任其勞自昏達曉恆屏息侍側衣不解帶先考病少閒命之稍休乃退而假寐有頃卽趨侍如初如是者蓋四載先考疾既不起先生妣劬苦之下重以哀痛體因以衰先生妣於不孝兄弟撫之極慈而約束綦嚴遇嫡兄家薰家法家芬尤敬禮有加常欲然意下若不自勝至愛吾諸弟家藩家蓀家菽則恩斯

勤斯不啻己出先生妣自奉綦薄惟性喜施與往往損己益人親友以緩急告者必量力仗助馭下明而恕感恩者或終身不肯去故卒之日奴婢皆號哭失聲先生妣體素充實早歲猝聞母喪遂得心疾是爲致病之始既遭先考大故歲乙酉不孝之同產兄遽爾逝世越五載伯兄家薰復捐館舍骨肉之變重遇疊見先生妣哭之極慟自此神氣沮喪而疾深矣不孝冥頑無知奄忽歲月不克早施補救乃至疾愈進而不可治而今而後遂爲無父無母之人此人子之至痛不孝之罪大也蓋

家荃之言如此謹案太恭人氏馮江蘇無錫人歸道銜江蘇候補知府趙公樸齋爲側室有子二人長早卒次家荃附貢生援例捐郎中銜加一級請四品封典得封母爲太恭人女子三人長適余亡弟炳縉前卒次適定海厲玉夔次適慈谿盛士廉余之族人也余於趙氏既有姻誼邇年卜居郡城去家荃之宅蓋百步而近以是過從益數嘗歲時登堂問候起居於太恭人之居心行事頗知其梗概其沒也烏得無辭辭曰

絜賢母之來嬪兮幸處順而安常世乃視爲庸德兮羌有美而弗彰思彷彿其懿淑兮愧語焉而莫能詳哀鮮民之在疚兮將終古其永傷

上浙江巡按使書

昨奉來函詢及勸辦和豐紗廠之經過情形並現在事實仰見巡按使注重實業之至意查和豐紗廠勸始於前清光緒三十二年股本六十萬元紗錠一萬一千二百枚開辦數年損耗至三十六萬元勢甚危岌宣統元年延炳緯爲名譽董事共圖挽救並約令不需股分不擔金錢干係炳緯自願購股一萬元以示利害與其之

意核算原有紗錠逢極佳之時會僅可獲入釐官息炳
緯念此永無恢復之望爰建議添錠五千六百枚約需
洋十二萬元其時本廠信用已失告貸無門由炳緯首
先籌借三萬元復由諸董事合借九萬元始得集事宣
統二年本廠發行借債證券鮮有應者由炳緯首先認
購一萬元以爲之倡甫及進行而辛亥光復軍起紗廠
停工是年冬據經理顧釗報告每月須損耗八千元炳
緯念前耗三十六萬元若停車一年又增十萬全廠休
矣爰於民國元年二月建議照舊開工因運本全無由

炳緯向上海興業銀行陸續借款五萬兩由個人擔任
干係至舊欠甬江各錢莊之款由炳緯擔保約期歸還
俾紗廠得安心營業是年仗經理人之實心實力獲利
四十萬元炳緯念危險幸已脫免爲永久獲利之計莫
如再添紗錠爰建議再行借債十五萬元按月提存餘
利五千元期以三年還清由炳緯首先籌借五萬數千
元復由諸董事合借十萬元因得陸續添紗錠六千數
百枚計二年三年獲利之數歲各二三十萬元於是和
豐廠基固矣勦辦之初原有紗錠一萬一千二百枚現

有紗錠二萬三千二百枚視昔已加倍有餘每紗一件
核算做工及廠繳向需二十四五元現可減至十匹元
首次添錠之借款十二萬元現已還清二次添錠之借
款十五萬元已每月提存預備於明年春季一律還清
前次股東會決議每股單一百元者可換給新股單一
百五十元循是以往但使經理得人可無失利之患至
勅辦和豐紗廠係顧釗周墉戴勳鄭賢滋范翊鈐錢坤
裕屠友益諸人炳緯未預其列近三年中計共獲利百
萬皆仗經理顧釗副理魏振勳坐辦張同彝諸人苦心
規畫炳緯無尺寸之勞未敢掠美旣承垂問不敢不據
實上陳至查詢履歷炳緯本籍鎮海現籍鄞縣浙東一
小民耳謹此上聞惟希鑒警

老友慈谿王君煥文七十壽序

往歲余自京師歸應省試假館於鄞城西趙氏時趙氏
家門鼎盛姻丈樸齋封翁以名德重望爲上海錢業董
事商界推爲巨擘聰明才傑之士奔走門下趾相錯也
哲嗣瑾伯諸昆季方散財結客賢士大夫爭相納交春
秋佳日羣屐聯翩有座客常滿樽酒不空之概顧其家

事無鉅細必以屬之煥文王君君亦視趙事如己事左右勩不遺餘力抑若爲應盡之義務也者余心竊異之一日從容叩君所以君語余曰吾生長田間一農家子耳自趙太公遇我厚識之於童年而愛猶骨肉今耿耿此心無一日忘也吾周旋趙氏諸郎閒有善則勸有過則規情意有隔閡者吾爲曲折以融洽之使各各稱意而後快而諸郎亦待我猶親昆弟相見以心久而益敬夫士爲知己者用其又奚辭旣而莞然曰子知我託業之所在乎趙氏營業所及南盡蘇松北達燕齊需才

多矣使占一優勝之位置當不吾卻而吾願執業於城東帽肆冉冉三十餘年投薄貲而營微利焉無他求也余聞而益重之余與君相知旣稔交乃日益親他日余家有事爲余力所不能任者輒挽君爲之經紀君亦夙夜勤劬一如其爲趙時其愛我亦與待趙氏諸郎無以異用是益歎君之肫誠懇摯根於性生所謂爲人謀而必忠者非歟君性行至孝自來甬上越數日必歸省母夫人安否孺慕之誠鄉里稱頌儉於自奉一絲一粟不敢妄費視人世紛華綺麗之習望望然去之若將浼焉

其處事以精密爲宗旨以勤幹爲作用取與之際尤一介不苟以是信用昭著慈人某君有質肆在姜村會計出入皆依賴焉辛亥光復事起閩貨權捐乏人主任適屬君綜理其事鄞邑城區有濬河之役眾議推君爲經董周歷相視必躬必親費省而事以集輿論稱之早歲就傅旋即舍去嘗以過時不學爲憾顧性耽文墨披覽圖書輒知綱要文史與義或猝未易曉者必咨訪通人反復研究至瞭然而後已尙論古人往往有獨到之識見爲老師宿儒所不及知者閒作書牘詞達理舉斐然

藝園勝覽

卷一

十四明叢書

約園刊本

成章蓋天資高朗復能虛懷受益故所成就如此吁亦難能已今歲甲寅二月二十又四日爲君七十生日趙君芝室來告屬余爲文以侑康爵君長余十年夙所兄事麥邱之祝臺萊之廣雖筆墨荒唐猶能爲之無容多讓顧余與芝室知君至深諛頌之辭度爲君所不喜無已其述余兩家平昔之交誼與夫歷年所傾倒於君者道舊故以爲笑樂以博君之一粲儻亦君所首肯者乎是爲序

述中校緣起

清光緒二十三年鉛山程公稻村知寧波府事與郡人嚴君小舫湯君仰高陳君季臺謀設中西學堂因湖西崇教廢寺爲校舍大率依據上海廣方言館章程注重泰西語言文字冀陶成英俊子弟以開風氣已由道府公署稟浙江巡撫及南洋大臣立案開辦矣繼乃商之吾友包君補園江君亭美袁君曜臣張君讓三及炳緯僉謂興學固善第事屬勦舉宗旨宜端否則流弊滋大且非得學優品端者主持校事安能招致才俊以張吾軍耶欲收成效則始基宜慎程公及嚴湯陳諸君深韙

其議謂嗣後校事聽諸君子規畫可耳乃議聘慈谿楊君遜齋爲學堂總教習楊君學有根柢通知時事師範尤端朋輩重之楊君至謂非改訂章程不能從事張君讓三迺與炳緯合草儲才學堂章程即名斯校爲儲才學堂楊君既主校事添聘侯官陳君繹如教授譯學江陰吳君成之教授算術其他經史詞章輿地等科皆楊君一身肩之風聲旣樹高材生接踵麇至若王君菽卿王君棻軒洪君樵舫林君孟垂朱君維周朱君賡堂劉君榮甫夏君仲彝王君雅林李君贊侯葉君叔眉何君

吟蒞陳君契琴等先後凡百數十人稱極盛焉嗣楊君應京師譯學館之聘去校繼主校事者爲關君萊青江君北溟復值國家明詔興學設專部定課程由是科學稍稍完備生徒益于于來矣三十三年寧紹台道萍鄉喻公庶三謂儲才校舍迫狹不足以容多士乃撥南郊道廠基地數十畝建築新校屬炳緯董其事凡十閱月而工竣於三十四年二月遷居計費銀圓六萬有奇其詳具余所爲中校建築始末記卽今之浙江第四中學校是矣方程公勦設是校固無常年經費每歲以私而

勸郡屬官僚捐助者十之四由城內外商店捐助者十之六歲得銀圓凡五六十未幾程公捐館款不時至而學校有舉莫廢十數年來當道輒屬炳緯奔走徵集不足則撥辨志文會原有之款爲中學存款歲收子金以資補助逮新校既啓存款皆供建築之用炳緯迺浼顧君元琛商之江北馬路工程局之主其事者歲撥銀圓二千七百數十以爲抵補逮宣統三年中學改爲省立支領省費舊日官商輸款及工程撥款或中止或借供他校云夫作事難於慮始程公筆路藍縷前無古人草

創章程固非易事其時擔簦負笈而來者類多知名之士棄其所優爲而攻其非所素習科舉未廢或父兄迫之就試輒於校餘私自溫習舉業冀得一當往往篝燈徹夜而不少休然試亦往往冠其曹偶蓋其用力視今學生加勤焉庚子拳亂邪說四播郡邑號薦紳者合謀欲燬校舍以圖消滅斯校之存不絕如縷可謂險阻艱難備嘗之矣今校章悉循部定經費一歸省撥諸生得并心壹志研精科學從容講習馴致大成以視疇昔難易昭然矣雖然莫爲之後雖盛勿傳人亦有言靡不有

初鮮克有終竊願與於斯校者思其艱毋忽其易也

記中校建築始末

吾寧波之有學校權輿於湖西儲才學堂卽後之府中學是也方始創時因浮屠氏舊刹爲諸生絃誦之地齋舍無多且不適教科之用豈昔之人智慮有未周歟大輅椎輪之製土階茅茨之風文明漸啓制作聿新損之益之是在來者光緒三十年萍鄉喻公庶三來知府事越三年擢寧紹台道在官率作興事尤以興學爲亟見中校狹隘議擴而新之從郡人請撥官產南郊道廠地

若干畝俾供建築道廠者清時官設造船之區久廢不用鞠爲茂草背河面江地勢清曠無城市湫隘罍塵之氣闢爲學校洵稱得地議既定喻公乃屬童君玉庭范君清笙暨炳緯任籌款及建築之事嗣童君以年老范君以事煩乃一以委之炳緯中學自撥受辦志文會儲款有銀圓一萬九千慮不敷建築之用爰從眾議斥賣湖西舊校及察院及同安公所凡三處共得銀圓四萬一千二百其由炳緯募集者有陳青州銀圓一千培養堂銀圓五百喻公復撥縣吏某報效之款銀圓二千以

益之惟是道廠以造船故有坎塹九深及尋丈填築平砌工繁而費重築不堅實房舍傾圮可以立待故施工益宜慎炳緯於工程素未諳習懼弗克勝范君清笙言其友石君純曉富有經驗可備顧問石君由工業起家輸萬金勘設鄉校踐履篤實有士君子之行炳緯爰舉鳩工飭材諸務一一與之商榷石君條理精密所論動中窾要其全校之布置若者宜堂若者宜室堂幾楹室幾所皆依孫君莘墅之草圖爲之任匠目某使分途哀集工料仍責其成於一人則陳君屺懷之所舉也石君

委其戚李君桂馥駐工所監視而已總其大綱事賴以
洽計築屋大小一百數十間講堂教室學生自修室寢
室會食堂雨天操場會客室僕役住室庖廂坑廁皆具
一切位置方向結構規模有葉君德之所繪圖在茲不
贅焉經始於三十三年二月凡十閱月而工竣共費銀
圓陸萬有奇計用之填地者爲數二千餘造屋者爲數
五萬四千餘置備校具軍樂圖書儀器及開校雜用者
爲數四千餘其他監工之報酬與馬酒食犒賞諸費皆
炳緯捐備不列入焉道廠基地喻公據工科吏某報告
計三十畝而弱開工伊始曾親臨指示址界東及廠門
而止今手工教室所在處有古柏數株右行向東數武
卽當日廠門基址施工及半炳緯於門外覓得隙地八
畝有零詢之菜傭知有界石沒土久矣胥吏利其租值
隱匿不報因清出之今所築操場會客諸室後此續造
之教員室皆其地也工既竣越二年馬君幼漁主校事
議添築教員室一區屬炳緯撥款銀圓二千餘時江陰
夏公閏枝知府事復撥官款銀圓一千以補助之於是
校舍益臻完備炳緯嘗念斯校之成有舉莫廢面積既

廣歲須修葺其款不可不豫落成以後卽購浙路股券銀圓二千五百爲歲修費私冀得當或更有以埤益藉權子母庶幾他日無風雨漂搖之歎自改領省款前此修費股券及贖款銀圓六百餘皆移屬他校矣主持斯校者當有以善其後也

題孫子授年丈畫冊

年丈子授孫先生咸豐乙卯與先君子同舉於鄉辛酉壬戌浙有粵寇之難奉太公避地甬上厥後郡城之復年丈與有勞焉未幾游歷清華供奉南齋侍學毓慶宮時先君子同官京曹因是往還益數憶歲癸未先君子將赴外任炳緯以庶常散館留京師一日年丈過寓廬欲招炳緯與長公墓韓同學冀收切磋之益並言退直餘閒當舉詞林故事一一相告意極勤懇炳緯自維庸陋未敢承命然前輩獎進之至意固永矢勿諉者也次公仲嶼監督來權浙海關稅官斯土者三年矣過從之暇出示年丈山水畫冊係庚申初入翰林時作距今甲子剛一周矣展玩數四始知年丈於臨池外兼工繪事能者固不可窺測耶炳緯未諳六法奚敢仰贊高深惟

幼年隨宦京邸幸接荀茵其文章道德犖犖大者輒聞
先君子稱述不置泰斗欽遲固非一日今瞻是冊後生
小子猶彷彿握衣撰杖侍立於長者几席側也

張氏寸草廬贈言序

寸草廬贈言者給諫肖菴張先生追念母節孝李太夫
人之苦節仿汪氏雙節堂贈言之刻哀集海內名流投
贈之作都爲一編者也余於先生爲館後輩平生風義
在師友閒曩官京師所居距先生寓廬咫尺朝夕過從
殆無虛日相見必商榷文字時或彼此互述世德輒聞

先生感念母太夫人之苦節與夫期望之殷訓誨之切
言次涕泗交頤至不能竟其辭余竦息敬聽竊念有是
母乃生是子蓋見先生至性至情數十年如一日其孝
思有足令人感動者先生由館閣入諫垣遇有論奏務
持大體不摭拾細故某歲聞東朝有易置大寶之意憂
懼至於廢寢忘食忠清直亮雖古名臣何以加茲先生
嘗自顏書室曰慕歐廬一日余私謂先生曰歐公蓄道
德能文章居諫院有直聲公所景慕固已他日儻爲先
德撰表墓之文如所云不辱其先其來有自者殆將襲

用此數語乎先生雖謙不敢承然窺其意未始不以余爲知言也先生之編贈言以文字表章賢母用意與歐公將毋同柰未及刊行遽捐館舍今哲嗣詠霓善繼善述重加編次付之剞劂以竟先志語有之莫爲之後雖盛弗傳今而後此書傳矣太夫人之節乃益顯詠霓以余稔知其家世乃屬爲之序余維詠霓爲此彰王母之苦節慰若考之孝思一舉而二善備焉天啓張氏俾孝子慈孫萃集一門儻亦太夫人之靈爽有以庇壽其後嗣而昌大其家聲乎豈偶然哉自世教衰微綱常墜壞忠孝廉潔之事不復問矣是編之成豈獨張氏世世子孫讀之生感於世道人心關係亦至鉅也覽是編者當不河漢斯言

嚴筱舫先生事蹟傳信錄序

贈閣學筱舫嚴丈先君子之執友也幼年從宦京邸聞先君子一再稱道丈以鉅人長德兼精藝事一日辱臨寓齋見余兄弟方習字輒教以臨池學書之法口講指畫娓娓忘倦比長稍習世事往來津滬見丈整理鹽筴恢擴商務凡所規畫高掌遠蹠具有包舉囊括之概私

喪景仰一如昌黎所云高山深林鉅谷龍虎變化不測
傑魁人也自歸道山勿勿二十年矣人之云亡邦國殄
瘁世無老成人後生小子益蹶蹶而無與歸安放安仰
之悲豈獨余一人已哉哲嗣子均觀察與余交尤暱緬
懷志事常以不克繼述是懼其族兄漁三受丈知最深
事丈年最久翩翩書記於丈一生事實暇輒紀錄乃擇
其有文字可據者輯爲一編曰事蹟傳信錄冀永流傳
備他日史官之蒐采書既成子均屬余爲之序語有之
莫爲之後雖盛弗傳烏序丈傳矣子均繼述之孝思儻
亦藉以少慰也夫

勤稼別墅記

姻丈時勳樊先生治別墅旣竟顏曰勤稼數典不忘祖
先生有焉蓋嘗論之吾甬濱海建郡闢爲商場生斯土
者皆注意商業自順康閒海禁未弛已冒險交通百餘
年來益奔走馳逐自二十一行省至東南洋羣島凡商
賈所萃皆有甬人之車轍馬迹焉所以然者國家休養
生息二百餘載戶口益繁甬地又斥鹵無沃壤廣土以
大興樹藝故種植之事講求者尠矣雖然自甲午馬關

庚子北京與外人訂約商人利源股削殆盡上海爲我國商務樞紐越歲庚戌敗象乃益大見其尤失敗者則甬人也甬人其尚沈迷於此而不知返耶然則吾立國之道與民人所恃以生活者如何曰農而已先生固老於商業而吾鄉人所尊爲巨擘者顧乃深識遠慮規畫於數年以前既佐張修撰季直於通海大營懇牧復諄諄然以勤稼詔告其後人烏虜此其故可思已余鄉人也於別墅蓋數數至見夫廣可十數畝先營家廟次及便蒙學舍別墅數楹以外花畦蔬圃蔥鬱可觀復於隙巷建築女學位置井然先生老矣猶神明不衰他日者息焉游焉攜幼子童孫且耕且讀吾鄉人之仰望先生者得日候門下進而叩其所以然之故然後知先生今日之所爲豈尋常營菟裘爲娛老計者所可同日語哉

猶子蘭孫五十贈言

吾家自雍正年高祖王父始遷鎮海居邑之東城四傳至世父蓉川公生二子長伯兄子常先生次仲弟竹書子常先生生二子長卽蘭孫次葆孫蘭孫於吾昆弟諸子中最長亦最賢吾心愛之固數十年如一日也嘗謂

一家之興必祖若宗克勤克儉累行積德然後寢昌寢熾俾子孫幸食其報非偶然也顧爲子孫者亦必率循規矩寧樸毋華寧厚毋薄寧拙毋巧無縱欲敗度以隕其家聲乃能縣縣延延閱世久遠而相承於不敝世父天姿卓犖懷抱壯志雖置身商界期望子弟輩讀書成名綦切子常先生仰承世父之訓年數歲卽從先考觀察公受書顧質性魯鈍制舉之業非所擅長年逾三十始青其衿秉性純樸不知人世有機械事受人誣謗躬任勞怨曾不少恤家故貧也尤敦崇操行非義不取料

量米鹽心力並瘁其刻苦有常人所難堪者用是鬱鬱遂捐館舍蘭孫之生也適當家運屯邇之際幼從伯兄讀書其質之魯與乃父相似而沈潛好學抑且過之歷年困頓名場曾不獲少吐抑鬱之氣亦與乃父同科名雖小事儻有命焉存其閒耶蘭孫旣不得志於有司余乃勸之變計圖自樹立時樊公時勳旅滬有聲闕闕間由余薦充記室蘭孫佐樊公十數年凡事諮而後行奉職惟謹樊公憫其勞苦思有以振拔之嘗欲遣往遠方藉資沾潤輒謹謝不敏樊公故後吾友謝君蘅臆深加

器重始令其經濟汽船出納之事有石炭鑛在江右者
欲舉以相屬俾奔走其事蘭孫以非所素習辭蓋其小
心抑畏恬淡寡欲量而後行量而後入無虛憍多忤之
習求之今日豈易得耶余生六十又六年矣追維先人
艱難締造忠厚畱貽獲有今日常以不克負荷是懼間
舉高曾祖父之嘉言懿行與夫固窮守約之事詔示兒
子輩俾知遵守慮其年少未必能聽聽也今蘭孫年亦
五十矣幼隨伯兄備嘗艱苦耳聞目見情事較爲切近
感懷舊德永矢勿諉與余當有同心他日者訓勉諸弟
及其諸子誦先人之清芬揚世德之駿烈繫維爾孫是
賴如樹木然根柢固者枝葉必茂庶幾身其康強子孫
逢吉有以繇盛氏之家聲於勿替乎

上海四明醫院記

自國家與歐美列邦立約互市寧波上海皆占五口之
一郵程往還夕發而朝至於是吾甬人奔走衣食僑居
上海者日增月盛無慮百餘萬人亦云夥矣人生居處
之道散布郊野呼吸空氣則心曠而神怡山居多壽不
信然歟滬濱數十里地耳聚全國人熙來攘往於其間

汽船汽車交錯道途一有不慎危及生命地價奇昂苛
征層出坐臥僅咫尺之地狀若拘囚俗尙奢蕩上下縱
於亡等之欲興居無節不辨昏曉石炭之氣日夜薰蒸
吸入肺腑而不自覺凡此皆足以致疾夫陽愆陰伏疫
癘興而疾病作雖聖帝明王之治世人和年豐亦不能
保其絕無矧丁擾攘之世習淫靡之俗萃數百萬眾雜
遷枕藉於一隅乎然則補救之方烏可緩哉四明公所
之設妙始於開埠以前而擴大於開埠以後邦人士旅
滬者篤念桑梓用意良摯凡所以爲養生送死計者已
無不周矣光緒癸卯復勅設病院越歲辛酉乃議拓建
醫院至壬戌秋落成合眾人之力費十萬金之財得數
十賢人君子率作興事爲之鳩工庀材而規模始擴美
矣備矣雖然成事固若斯之難也余鄉人也幸此舉之
有成望來者廣續爲之永永勿替故樂爲之記若夫地
址所在室宇規制及設備一切具詳葛君恩元所爲文
茲不複述焉

祭清誥授建威將軍浙江提督軍門呂公道生文
嗚呼邦國殄瘁人之云亡公歸不復我心永傷緬維我

公清代之良幼負奇氣膂力方剛遭時多難擊鼓其鏗
赤眉銅馬胥虐胥戕投袂而起廁身戎行誰其知我李
公鴻章奇公材武曰百夫防從勦捻寇戮力疆場直東
皖豫旌旆相望援鄂援陝啓處不遑接統盛軍萬騎騰
驥畱駐馬廠建議墾荒造閘引水軍有宿糧新農營勇
東竄猖狂單騎曉諭方駕汾陽歲在辛卯教匪披猖出
關會勦師駐建昌時未六旬殺伐用張斷頭道主攜手
蒙王軍有紀律民歌樂康香花牛酒承筐是將帝錫勇
號曰勇曰強甲午一役謀夫不臧喪師辱國士氣凋喪
摩天峻嶺人怯我當設伏待敵敵走且僵敵且誤我洋
兵華裝公燭其偽報以斧斨潛遣勁旅繞襲四旁殲彼
統將三造富岡國有人焉咄爾東洋庚子拳亂沸羹螭
蟾翠華播越西去蒼黃聯軍大集失我城隍津沽重鎮
人心皇皇賴公擔拄艱險備嘗兩宮回蹕入都對揚溫
旨慰勉天語煌煌福壽虎字玉躡裝演賞穿黃袖增輝
甲裳帝眷南服移督浙疆駐節句甬欣瞻末光正己率
屬勞來直匡大風雪夜周歷城廂短衣匹馬戴星冒霜
曰余敢逸習勞其常綠營裁汰餬口無方爲籌生計巡

警學堂講明法律細目大綱弁兵子弟曰汝是獲今日
警吏昔年門牆沐公造就遺澤孔長見幾而作善刀而
藏攬勝鍾阜買宅新廊聊資息景翼遂徜徉國步忽改
世變滄桑蟲沙猿獬豺狼謂公大官宜有積倉效
忠清室宜予懲創他人入室于囊于囊公乃出走藉避
鋒銳滬濱棲止旅况淒涼咫尺甬水宦遊之鄉部民敦
請來此何妨辛亥革命武夫橫橫賴公舊部爲我保障
憶公治甬愷悌慈祥口碑載道士農工商宦成歸里民
不能忘去而益詠存以甘棠公今來止萬首皆昂願瞻
顏色山海梯航七秩攬揆厲至奉觴臺萊頌美滿紙琳
琅庶幾耄耋長生未央胡天不弔病入膏肓鵬悲賈誼
蜨化蒙莊浮雲變幻天意蒼茫老成凋謝萬眾俛俛感
懷曩昔泣涕悵徨靈輅將發送歸北邙何以奠之桂酒
椒漿尙饗

甬上青石張氏家譜序

嘗謂史記年表桓譚謂旁行邪上並效周譜知譜之由
來舊矣古但曰某氏譜其曰家譜據隋書經籍志唐書
藝文志所載始有之其題里居爲標目者始見於隋志

之京兆韋氏譜唐志之東萊呂氏家譜今張氏纂家譜
題曰甬上青石張氏殆援京兆韋東萊呂之例歟張氏
系出宋宰相文節公知白至四世顯自平江遷慶元居
鄞之十七甲是爲遷鄞始祖至二十二世泮明汀州府
學教授乞假養母歸居青石橋聚徒講學學者稱味芹
先生其稱青石張氏由此始自味芹先生以下至二十
七世士墳土培從姚江黃梨洲先生入證人社稱高第
弟子士墳著有黃過草堂詩集士培著有雪汀詩鈔二
十八世錫琨著有棊猗閣詩集錫璜著有半舫齋詩鈔
錫聰著有圮上居集昆季皆從慈谿鄭寒村先生遊全
謝山先生稱爲黃門再傳弟子羣從兄弟曰鐸曰錫玠
曰錫璣亦皆能詩二十九世寧永助謝山採續耆舊集
之詩學齡與婦范氏俱以詩名三十世炳精研經學師
事謝山與蔣檣庵盧月船董小鈍范冲一諸先生爲友
稱雙韭山房五大弟子其後吾友美翊讓三亦以博學
能文用光先緒爲當世所推重一門文學累世相仍可
不謂極盛矣乎士墳土培之父遐勳孝友見稱族黨此
又庸德庸行不恃文字以傳世者矣甬上舊家向推豐

樓史袁乃張氏文采風流代生賢哲獨與之相頡頏其
爲吾閩里光可勝言哉張氏先未有譜也至三十二世
世安思繼二十八世錫璫三十世雲亭之志手輯譜彙
未成齋志以歿以遺彙授姪溪蘅溪蘅歿復授姪讓三
今讓三復歸道山乃授同宗延章俾竟其事蓋萑苒四
十餘年矣延章雖廁身商業而性耽風雅與文人遊因
延慈谿魏君拜雲爲之校理並就質於同宗亦湘裴伯
叔馴諸昆季始得編輯成書竟累世未成之志吁可云
難已至其體例悉仍讓三手定不稍更改蓋其慎也旣
成屬余敘其緣起如此

養園臚彙卷二

鎮海盛炳緯省傳著

外舅王海帆先生德配外姑謝夫人七十壽言

王氏系出宋太傅文正公元至正間南岐公官定海縣尹有惠政道阻不得歸蜀遂家焉其大宗世居鎮海之五里牌亦分支居邑城鼓樓前鎮海自清康熙開始析爲縣故定海境也十七傳至外王舅琴生公以碩德清望名播華彝由商而仕合肥李文忠公深倚重之於是家聲稍稍大矣配外王姑徐太夫人生外舅海帆先生

養園臚彙卷二

一

四明叢書

約園刊本

配外姑謝夫人十月十三日爲謝夫人七十設祝之辰海內知名士與海帆先生有縞帶之誼者多爲文以壽炳緯甥也烏可無辭謝夫人作嬪王氏正當琴生公貴顯之時婉容愉色備極孝養上奉庭闈與海帆先生偕隨五十年旁無姬侍齊眉舉案白首相莊處己以儉接人以和教子女不嚴而肅待三郇禮意周浹惟恐失之下逮臧獲遇之皆有恩紀生子四人長松年次岳年皆早卒次柏年次鳳年女子四人適袁適武適盛適朱孫五人祖慶祖樾祖望祖德祖成曾孫四人肇元肇基肇

祥肇初柏年鳳年夙習外洋語言文字研求計然之術
高掌遠蹠皆有聲闡聞祖慶自歐洲遊學回國方練
習商務圖自樹立祖懋祖望祖德祖成諸昆季皆斬然
頭角瑤環瑜珥蘭茁其芽所居有崇臺廣廈隙地數弓
雜蒔花木春秋佳日流覽園亭開豁懷抱子婦追隨孫
曾翊衛舍飴撫弄喜可知也一庭之聚順晚福之駢臻
他人占其一節輒動色慶幸謝夫人殆以一身兼之其
宜壽也豈煩覩縷抑炳緯竊有說者深山穹谷有大木
焉參天蔽日蔭可數畝要在厚護其本根然後發榮滋

長閱千百年而不改柯易葉炳緯處甥館久見海帆先
生秉正嫉邪好是正直非義所在一介不取曰此先大
夫之教也燕居侍坐輒聞稱道琴生公之嘉言懿行與
其遺聞軼事言之不勝餘慕謝夫人檢校內政自酒漿
縫紉以至禮賓承祭經紀百端動循成法曰先太夫人
詔我矣若者宜豐若者宜儉敬誌之不敢忘炳緯乃恍
然於厚福厯祺之集持之有故而致此有由如樹木然
此物此志也今海陸大通世事變遷日新月異昔之人
不自暇逸先知艱難之至言直常談耳柏年鳳年昆季

方馳思廣博出其聰明材力與海內外賢豪角逐恢廓家業日起有功勉之哉聰聽祖考之彝訓保此敦樸純懿之氣象傳之來禩永永無極所以光昭祖德昌大家聲者道在是矣卽藉以博二老之歡心洗腆致酒爲堂上慶者計亦無逾於此若夫祓飾盛美效麥邱之祝辭則大雅闕達之彥篇章具在炳緯蕪陋謝不敏已謹序

甌海觀政錄序

公牘文字之衰有專書者藍鹿洲負幹濟之才汪龍莊嫺法律之學政治家皆推服無異辭顧余所尤深慕者

卷二

一二四明叢書
約園刊本

若陳文恭公樸實說理滿腔慈祥愷悌流露於楮墨間若曾文正公實事求是開誠心布公道雖驕兵悍將受其訓誡無不帖服二公學問事業度越等倫凡所發摠一根道德固不當於文字間求之卽論文字亦庶幾易所謂修辭立誠者歟函之黃先生由甌海道尹調任會稽官斯土者三年矣道尹一職今之從政者視爲閒曹或俛仰偃息頽然自放先生旣下車率作興事輒以興利除弊爲志誥誡僚屬剴切詳明無日不操不律從事一如官甌海時嘗自言吾治官書久矣獨自恨文筆不

足動人夫以言感人其感已淺雖然至誠而不動者未
之有也先生乃自視歔然如此烏辱其所志可知矣先
生在官於暇日編甌海觀政錄八卷印既成屬余一言
序其端余受而讀之不禁竊有感也自國是紛紜官方
頽壞安得起文恭文正於九原設誠致行爲百僚矜式
庶幾蕩滌邪穢吏治民生或有補救之一日先生既不
以碌碌者自居他日日出其蘊蓄見諸設施良吏風猷名
臣勲業必有進而益上者是編固不足以盡之荒落如
余且將歌芾棠芟舍之詩操筆而從其後已

黃母朱太夫人八十壽序

已未立冬金華道尹上海黃公涵之由甌海調任會稽
莅官甬上其治甌政通人和百廢具舉比去都人士臥
轍攀轅固留而不使行徒以太夫人年高滬甬水程夕
發而朝至板輿迎養視甌尤近因是獲莅斯土既下車
察知官商隔闕下情之未能上達也迺捐棗文法事事
相見以心民乃大慰其爲治之旨在以不忍人之心行
不忍人之政日治函牘訓戒僚屬指陳地方利病纖悉
周至惟恐一夫不獲其所下僚有漠視民瘼者輒嚴繩

之不少貸嘗見屬邑糧食不繼則設局廣行平糶見寒
燠不時疫癘將作則設臨時治疫醫院預爲防杜見嬰
堂頽廢則邀集紳商力籌整治今年秋鄰邑及台州轄
境蛟水爲災聞報輒寢食俱廢念非一人之力所能振
也迺汲汲勸募如身在洪波巨浸中呼將伯以援手凡
所設施皆大捐廉俸爲之倡不足則斥家財以補助之
炳緯音接既頻徐叩所以曰此吾母朱太夫人之教也
太夫人爲封翁春甫先生德配幼年肄業上海女校自
歸封翁曲盡婦道處妯娌無閒言封翁精研方術弱冠

卽爲仁濟醫館主任太夫人操持家政教督子女俾封
翁專心館事無內顧憂封翁性好善居積所入悉以施
濟創設牛痘局於邑城首開風氣給孤貧口糧助災區
振款歲以爲常復出資設義塾於育嬰堂獨力創辦三
育兩等小學校費至鉅萬太夫人皆節衣縮食以佐之
封翁事煩日不暇給太夫人遇戚好貧乏輒解囊無吝
色以輔封翁之所不逮封翁於醫術既富有經驗營白
處方合藥以施病者太夫人至今踵行之求者門常如
市歲糜巨款曾不少惜封翁之沒也所營商業被人侵

蝕涵之道尹方宦鄂省馳歸清理太夫人誨之曰寧人負我毋我負人人皆感愧卒亦無恙今年五月爲太夫人八十生日值軍書旁午京邑俶擾未遑稱慶逮時局稍寧又以屬境水災命節宴飲之費爲振卹之助堅卻稱觴之請涵之道尹求所以慰親心者迺承命惟謹昔萍鄉喻公兆蕃以觀察使奉母夫人宦甬值親年八十郡之賢士大夫皆躋堂稱祝越十年而涵之道尹莅此二公皆賢者政績皆有可紀而母夫人年皆八十後先輝映於戲盛已顧萍鄉莅官在專制之代率作興事可

恃官權以爲振動涵之道尹則惟恃慈祥愷悌與郡人以誠意相感發然後集事其難易似少判焉用是益歎太夫人善心爲竊播爲家訓俾令子循是以著爲政績其所佑啓固甚大也嘗觀公文伯之母勗子以勤勉情不疑之母教子以寬平伊古名臣循吏多資母教涵之道尹何修而得此耶然句甬數十萬家賴有賢尹俾吾民身被其澤亦何莫非太夫人之所賜耶太夫人年老矣猶神明不衰強健如少壯時子婦奉匭孫曾繞膝一室融融聞者動色稱羨余獨謂此意中事夫人身一

天地也雨暘應時太和翔洽則陰陽疹癘之氣自無自
而興其宜壽也固然其無足怪抑更有說者好生者天
地之德世界雖極渾濁揆天心之仁愛殆必不貳不息
頗聞太夫人樂善好施數十年如一日料量歲入稍有
餘資卽儲備以充善舉天不欲一日絕斯人之生則斷
不靳太夫人一日之壽庶幾林生眾羣之徒歲歲有所
託命感召之理固應如是而修德獲報之說不與焉繼
自今大耋期頤繼長增高炳緯雖不文且當晉無疆無
期之頌操筆而從其後已敢質之涵之道尹儻亦以爲
知言乎

題鎮海向氏先世畫像

吾邑善家恆言金向鄭王向氏世有令德家聲至今弗
替裔孫吾友鳳樓文章行誼爲鄉黨推重自廢科舉佐
理滬上商會書牘聲譽益起願以回里鮮暇感念栝椽
輒深餘慕因倩工畫先世眞容成冊尊藏篋笥使歲時
展拜仁人孝子之用心固應如是吾家自雍正年由鄞
遷鎮居邑之東城歷高曾祖父凡四世與向氏先德有
縞帶之雅自紅羊告劫先人舊廬鞠爲茂草炳緯徙居

鄞城猶因故址葺爲宗祠春秋享祀時一至焉每覽候
濤登梓蔭穆然想見鄉先生之流風餘韻輒低徊不能
去詩不云乎惟桑與梓必恭敬止今瞻是冊道貌衣冠
依然如昨後生小子髣髴侍立鄉先生几席側也

茗香館詩草序

吾友祝君幼珊歷司吾鄉權局多所上增國課下恤商
艱道可兩全課輒報最余傾慕久矣一日出示其先德
茗香先生詩藁幼珊之言曰先王父當道光咸豐之際
遊幕淮泗閒雖戎馬倉皇而不廢吟詠今遺文零落僅

卷二

入四明叢書

約園刊本

得詩數十首擬付手民印行藉存手澤子盍爲我序之
余受而讀之當先生客游濠上正中原鼎沸之秋轉徙
兵閒備嘗艱險集中如四月十一日紀事濠上泛舟寇
退四城諸作一似杜少陵生天寶亂離之年憂時感事
下筆輒露蒼莽悲涼之氣湘鄉曾太傅有云劫後文章
每多苦語不信然歟正陽關一篇亦石壕吏潼關吏之
遺響也七律體勢排奐左宜右有晚江中丞一律尤不
愧詩史之目哭弟晴帆詩聲情絕似昌黎十二郎文是
直以韓文爲杜詩矣餘作亦深情逸韻妙造自然雖篇

什無多吉光片羽不彌足貴哉幼珊當簿書填委之餘
撥拾叢殘俾先人遺著得以歷久常存孝子慈孫之用
心令人肅然起敬亦以見先生苦心孤詣精靈所聚雖
歷劫而不容湮沒也

謝節婦家傳

節婦姓陳氏餘姚縣人父曰開先年二十一歸同邑謝
君厚甫謝氏以商起家舅榜徽府君客滬尤著聲望姑
徐太夫人居家皆屏絕浮囂力持儉約節婦辨色輒起
事必豫治夜分始息不敢告勞酒漿縫紉以一身任之

卷二

九

四明叢書
約園刊本

最得堂上歡歸二年生子榮渙厚甫君年二十商於滬
體羸患咯血節婦調護維謹一日自市肆歸遽踣於路
疾益亟遂不起節婦慟甚矢以身殉舅姑以撫孤大義
責之得不死未幾北方拳亂風鶴之警遠達海上節婦
挈榮渙避外家時萬眾競趨輪舶兼值酷暑疫癘薰蒸
比至而節婦病榮渙且大病昏瞶不省人事節婦乃大
戚曰未亡人偷息人世爲此襁褓物耳脫不保何生爲
會有天幸榮渙病旋愈然節婦病自此深矣榮渙稍長
讀書澄衷學校校距寓舍稍遠節婦蚤起爲治朝餐日

未映已倚閭而望入夜躬自督課一燈熒然刀尺聲與誦讀聲相閒也暇輒舉楞微府君幼年堅苦力學之事以相感動勉以繩武棗渙旋肄業聖約翰大學學業精進馴致成材蓋得自母教爲多節婦無女撫夫弟女爲女女忘其母而母節婦節婦亦忘其非已出也夫弟某少時患喉痧家人懼傳染多遠之獨節婦躬左右之病以獲瘳其他拯人於危義無退避多類此節婦處已儉而待人寬疾惡暴嚴聞善則譽不容口水旱偏災捐貲振貨無少吝親故以匱乏告必應其求里黨有樸愿而

無職業者必命子薦引之道路橋梁時有修治每冬購米數十斛以給貧者將卒詔棗渙曰吾年踰曰艾卽死無所憾惟是世路險巇立身非易汝其毋驚高遠毋貪非義毋忘彝訓毋墜家聲此吾志也吾平生餘蓄可歲取息金爲恤嫠用不足則益之吾固嫠婦也備知苦況汝其謹誌之勿忘卒於乙丑年某月某日春秋五十有

幾

舊史氏曰婦職奉舅姑相夫教子而已不幸而喪所天教子之責集於一身用是益兢兢也顧克家不數覲而

奮迹多在孤兒豈惟教之之善抑天之所以報節母歟然則爲之子者宜如何感發興起歟

傅曉春先生家傳

先生諱昌順字曉春姓傅氏先世本閩人有諱光祿者商於浙之鎮海遂著籍焉考以和公處境困約潛德弗耀子五人公其季也以和公捐館數月妣劉太恭人始生公公生已不及事父事劉太恭人至孝感念劬勞奉養維謹劉太恭人目微嘗調護備至髫年輟學業買始執事於布肆已而改入木肆時汽船未盛行於中夏木

肆皆自置海舶南至閩嶠北達遼海販賤鬻貴藉通材貨船設一人總其事責重事繁非篤誠兼有幹略者勿克任主者重公才一以相委公亦黽勉從事歲時駕船出海歷驚濤駭浪不爲苦誠信既孚諸以木材爲業者咸相景附先後二十餘年爲其肆致贏無算性好交遊所至必訪其地賢豪長者而友之俸給所入半供酬酢皆出私財不支公費自奉儉約所御縕袍或更十餘年不易而急公好義惟恐或後戚友有匱乏者恆不俟告而周濟之鄉里公舉春秋社祭及修治道塗橋梁靡不

稱量依助俾底於成而於報本追遠尤慨然引爲己任某歲有族產水田若干畝爲奸人夤緣一二不肖子弟私鬻於里豪某宗人畏勢知其事而勿敢問公自海上歸里廉得其實嗚然曰是高曾之遺禮祀所需爲子孫者乃坐視他人篡奪吾傅氏尚爲有人耶乃慷慨具牘訴之邑宰一再集鞠宗人之怯者怠者皆畏避公獨侃侃陳辭邑宰爲之動容得盡反所鬻之產凡訟事所費皆一身任之鄉里因事有爭議不決者就公評衡曲直得一言無不立解性尤切直嫉惡綦嚴少年子弟言動

有踰越軌範者輒面折之不少假論者謂公隱於市廛而以身繫鄉黨教化之重並世士大夫或不逮也生於道光二十七年年十七出嗣爲叔父以慶公後卒於光緒二十四年四月三十日春秋五十有二配李氏繼配陳氏子二宗德宗耀孫四人瑞鑫瑞森瑞銓瑞鈴以子宗耀貴贈朝議大夫

贊曰曩讀湘鄉曾太傅大畧墓表述乃祖星岡府君嘉言懿行綦詳撮其要略如敬宗收族扶正抑邪分財以周窮乏解紛以息爭訟華華諸大端考其行事多與傅

先生生平相類特曾氏居山鄉習於農事則講求樹藝
傅氏居海濱俗尚懋遷則習於舟楫所產之地域不同
故設施亦異耳每見英豪崛起卓自樹立聲施爛然世
之人皆震而驚之而追溯數十年前其祖若父雖名
不出里巷然已往往有大過人者芝草醴泉根源故在
特未發見世莫知之耳烏虜天下事豈有無本者哉

何旭蕉先生家傳

公諱涵譜諱開昕字旭蕉世爲象山縣人曾祖諱某祖
諱某至諱某字硯秋者以公官封奉政大夫公之父也

卷二

十三 四 朔 叢 書

約 園 刊 本

天資敦敏自幼讀書輒明倫理大義事父硯秋封公母
鄭太孺人以孝聞鄭太孺人患肺疾公讀書餘暇輒趨
侍左右調護備至事兄及女兒曲盡愛敬早歲入邑庠
爲諸生以象邑介居海澨見聞較隘迺游學杭垣得廣
交知名士業日益進數奇屢困鄉闈光緒丙子始舉副
榜貢成均時封公春秋已高公眷念晨昏遂作歸計歸
後與兄西槎襄治家政封公顧而樂之於心大慰越數
年新宅落成遵父命析產公獨有推讓之美兄子六人
賴公飲食教誨皆視同己出或嫌分授之屋不廣公割

己所得者以益之或苦築室乏基址公輒畀以地或患
瘵症困牀褥者累月公挈歸調治服食藥餌皆躬爲檢
點病以起更與其子娶婦俾有家室封公幼失怙恃欲
申報本追遠之義擬建宗祠而未果公矢志興築寢饋
不忘光緒丁酉費白金萬餘始得竣工以成先志村有
神廟無恆產春秋報賽按戶輸貲人苦其煩公爲籌集
基金兼置產業俾歲收息金由是祀典無闕並於廟之
旁屋設學校以課村童所居鄉多築隄障海爲田畝每
逢夏早有鹹水浸灌之患響巖潭者爲山流匯集之處

封公嘗欲築堰蓄水公與其兄出貲疊石築堰然後淡
港村數萬畝田皆得收穫象邑地接台州寧海時有匪
患公練鄉團衛之鄰村恃以無恐一夕某村有數十匪
徒持火器肆劫求救於公立率團丁往捕匪始竄去邑
之張輿有奸民糾合台匪樹旂倡亂汎官教士皆被擄
城內外居民聞警逃避邑宰他出綠營弁兵皆束手勢
張甚公集壯丁扼守要隘杜匪越出爲患然後馳稟大
府並函商寧海管帶營官定期進剿得一鼓掃蕩方事
之殷方略皆公所密授比邑宰回任而事已平矣公淡

於仕進授桐廬縣學教諭數月卽解組歸後以輸餉授
內閣中書亦未赴京供職居鄉不分貧富惟善人是與
待年老肯尤有加禮幼穉無依者輒收撫之及長爲之
婚娶待臧獲亦有恩紀爲人排難解紛扶弱抑強不避
嫌怨處人骨肉閒尤能動之以情所居村有事必奔告
於公聽其裁判由是數十年鮮有赴公庭訟曲直者性
喜施與人有緩急告者無不仗助遇戚友尤厚生平敦
崇實踐不事鋪張年屆六七十以稱觴請者皆力御
之曰不朽有三所謂壽者在彼余無能爲役也其謙遜

如此年七十九因匪擾避地僑居甬北遂卒時癸酉某
月某日也配某氏先公卒繼娶某氏子一明柔秉資聰
穎年少好學識者卜善人之有後也

贊曰士大夫居鄉有應盡之責任焉遇邑有大利害若
痛癢之不關身心似似甘伍庸俗世安用是士大夫
爲夫天下大矣亦一鄉一邑之所積也使各行省各邑
得如公者一二人參錯其閒利烏有不興害烏有不弭
則國亦烏有不治余於十數年前始一識公相與傾吐
懷抱縱論時事竊歎吾鄉人蓄道德而負才能者如公

可一二數也入此歲來世變益亟公挈其家避居甬北
比余聞信往視而憔悴憂傷疾已不可爲己邦國殄瘁
人之云亡余誦斯言豈第哭其私哉

題謝母王太夫人遺像

噫嘻是吾友謝君蘅臆之母夫人嫺姆訓於早歲指清
門而來嬪舉案方其賢淑挽車遜此艱辛歐母晝荻以
示教陶母截髮以畱寶養成令器才邁等倫理升人之
職業展少伯之經綸母也娛養堂之綵舞撫飴室之麟
振樂編棊輒屏五采安潛泊不御八珍自甘扣損徧惠
周親善心爲竊博愛謂仁施衣則歡騰挾纊發粟則數
盜指困蓋數十年中出水火而登衽席者非涸鮒之枯
瘠卽嗷鴻之災民晚耽禪悅了悟夙因旣皈依乎我佛
將朝拜夫上眞忽焉怛化長此歸神皋魚之銜悲何極
中壘之列傳方新母儀在望萬禩千春

藤雪樓詩鈔序

吾友漢陽趙大令種青年逾六十矣手編其所爲詩見
示屬爲之序余知種青最深烏能無辭種青廉吏也始
佐徐蓉齋大令治鄞提倡風雅識拔多知名士滁州呂

道生軍門治浙延入幕府倚以治事尤見賞於萍鄉喻
庶三方伯方伯嘗語余曰下僚中有是人乎吾當振拔
之未幾萍鄉以憂去官於是種青亦落拓少知己矣二
十年來歷司榷局多所他人得一則囊金輒充種青處
膏腴而不潤依然一窶人子也性耽吟詠積詩盈篋有
所作閒就余商榷一二余維種青之詩直抒胸臆不假
雕鏤不事模仿氣足以舉其詞筆足以達其所見雖信
手揮寫其精到語亦往往他人窮年研鍊所不能有余
嘗謂凡事皆關天賦意其性情所近得於天者獨優耶

種青兼工繪事每作一紙輒題詩其端言淺意深涉筆
成趣使青藤板橋不得專美於前並世畫家未之有也
自來漚瀆微祿不足以資養贍兼鬻畫以佐饘粥與海
內名家頡頏畫境日進詩學亦輒隨以俱進觀其老而
好學孜孜不倦他日更編新著必有進而益上者是編
殆不足以盡之也

奠伯兄醉六文

嗚呼吾兄曷爲云亡世事顛倒天道渺茫降割吾家乃
以兄當自兄年少性行溫良讀書京邸誦聲琅琅曲臺

禮記春秋公羊程朱語錄韓歐文章口誦手寫日昃不
遑中朝故事耳熟能詳聽者忘倦盈耳洋洋馳聲日下
太學翱翔公卿延譽學富縹緗歲在癸未吾父啓行天
子有命備兵荆襄兄從之任險艱備嘗侍奉父疾寢不
安牀痛遭大故慟哭呼搶弟方使蜀聞訃倉皇扶櫬旋
里承歡北堂文場小試名冠膠庠棘闈屢躋未遂騰驥
曾不少感曰此無妨秉性長厚言表行坊不逆不億可
欺以方事無鉅細不自主張曰弟來此汝謀孔臧有事
服勞習以爲常愛憐吾子期登廟廊千慮一得片善微
長譽不絕口逢人必揚素性淡泊素體康彊謂兄必壽
毫釐難量兄亦謂余願弟健康白頭攜手鞞鞞棣棠此
言在耳吾豈敢忘兄年四十始賦弄璋抱孫願切曾不
獲償嫂氏徂謝吾姪繼殤悼亡潘岳喪明卜商一身兼
此摧心腐腸天平酷虐加此痛創公路稱帝羣小猖狂
同避滬濱匿跡韜光風波少定曰歸故鄉往省女弟獲
遂徜徉飛電相召舉室驚惶猶冀小疾未入膏肓足違
心急大海歸航疾馳到門始知無望閱時三載乃遣三
喪與兄相處六十星霜歿未訣別我心永傷煢煢弱息

贖此嫻嫻受兄付託中夜彷徨後死有責不逮誰匡夾
鼻之麓丙舍之旁爲兄相地曾筮歸藏行當鳩工龜勉
相將靈輻將發送君北邙維以告哀奠此椒漿靈其鑒
之嗚呼尙饗

上虞經氏族譜序

吾友經君錫疇世居上虞經家灣念傳次久遠譜牒未
具懼其久而湮也乃獨力纂修宗譜旣成屬余爲之序
按其家世宋宣教郎諱某河北范陽人隨高宗南渡始
著籍上虞曩歲晤同安辜君鴻銘爲言浙之幅隕視各
行省爲狹而聰明奇偉之士多出其閒蓋自南宋建臨
安爲都會汴京衣冠文物隨駕莅止中原神明之胄薈
萃於斯土宜非他省所能幾余始以辜君爲諛辭對浙
人則云然耳二三十年來詢訪詩禮舊家先世多自汴
梁南徙其後乃代有聞人始歎辜君之言固信而有徵
者已今經氏自其始祖至錫疇凡十九世遙遙華胄遺
澤孔長豈待言哉錫疇家故貧也奮迹孤童起家商業
比歲生計稍裕輒亟爲此又其處境備受激刺羣從
兄弟動輒脔削無可告語願錫疇一以大度置之蓋平

日恪循昔賢敬宗收族之大道纂修宗譜特一事耳世變日亟異說繁興不惜舉我國數千年相傳之家族主義而掃蕩盡之錫疇商人也乃持之不惑此非所謂賢豪閭者耶經氏族人其有志錫疇之志者乎子子孫孫勿替引之非獨錫疇之心慰儻亦經氏十數世地下之英靈實式憑之也夫

炳桂經君家傳

君諱炳桂經氏世居上虞縣經家灣曾祖諱開元祖諱有旺父諱玉華經氏在宋爲河北范陽人自宣教郎時

藝圃叢書卷二

二十四明叢書

約園刊本

深從高宗南渡始卜居上虞至君凡十八世皆潛德未曜君年十二三丁紅羊之厄家業蕩盡有弟三人長者遭匪掠去父玉華因亂得疾漸至殘廢母胡太孺人設肆鬻小物藉得餬口君執役雖極勞勩不敢懈年逾弱冠隨戚某至上海上海方與外人立約互市始開商埠君乃學習泰西語言文字未數月輒能操英語與外人酬酢外人招之俾經紀其所設商店旋加倚任握重權焉年二十四娶室吳孺人生男子二錫光錫疇女子子三自君以忠信篤敬見重外人始稍得布置家事既爲

仲弟娶季弟聘俾各有家室又爲仲弟及從弟某謀安身之所設肆二俾一鷺果實一販穀米其他族戚以空乏告者無不量力俛助年四十有一家業駸駸起矣錫光忽病亡堪輿家言因祖墓後地被族人發掘私埋骸骨致傷地脈象大凶占之果然君慟子情深遂苦心痛旋成痼疾未二年遽捐館舍卒於光緒七年八月二十三日春秋四十有三葬上虞毛竹篷溪頭妣胡太孺人墓右配吳孺人卒於光緒三十四年四月二十一日春秋六十有六葬毛竹篷溪頭溪之東首

贊曰余交公子錫疇見其慷慨磊落不輕然諾有古俠烈士風意其得天獨厚或家教然歟及爲君作傳詳考事實乃恍然於錫疇厚其本根揮斥重貲而無少吝惜者其來有自語曰莫爲之前雖美勿彰諒哉

童小橋先生遺彙序

余友嚴君子均搜集令舅氏童小橋先生遺著付手民印行郵書示余屬爲之序小橋先生襟懷豪邁稠人廣坐議論風生其磊落英多之概迄今猶能想像及之書法俊逸直窺顛米堂奧扁榜大字尤瀟灑出塵雙鉤特

餘事耳不知其兼嫺吟詠也今觀所作直抒胸臆不依傍他人門戶自成一家書如其人詩亦如其人矣所編詩話於網羅散失之中兼寓表章先哲之意其用力可不謂勤乎自科學盛行風雅之道亦稍稍衰矣子均爲此非獨鄭重遺文篤於涇陽之誼亦以見扶輪大雅爲藝林添一韻事也

周星北六十壽序

吾友周君星北年六十矣八月三十日其生日也始余奔走南北里居之日蓋尠與星北未相習也近二十年

來遇鄉人自天津歸者輒稱星北見義勇爲爲人排難解紛肝膽相照或事關重大他人當之趑趄不前尤非君莫能肩任其經營商業亦信用昭著候時轉物動握勝算因是家業日起吾鄉聰明才智之士多發跡商務其始所處至約及其盛也長駕遠馭一日千里雖古陶猗不爲富蓋亦地勢使然意星北名滿海內外其人必魁偉奇特高掌遠蹠具有牢籠一世之概及相握手則見其謙卑自牧退若不勝與人交和光同塵油油然與之偕使人各當其意以去每自津歸存問族戚禮意周

至道舊故爲笑樂或移晷不倦始歎君性情之敦篤學
養之深邃固非恆情所可測也君家世商業尊甫漁史
先生長才碩德爲鄉黨推重余年弱冠由京師歸應郡
縣試遇事諮而後行比再入都銜命使蜀奉諱還鄉爲
先君子治大事欲再奉教而先生歸道山久矣及交星
北猶想見先生之謙光和氣動人傾慕知星北淵源家
教其來固有自也自三代以降民分爲四士食舊德之
名氏農服先疇之畎畝商循俗世之所鬻工用高曾之
規矩大率如是湘鄉曾公嘗論古今世家獨有所謂詩
書之澤稼穡之澤者自余言之四民旣並立於天壤商
歟工歟其傳世久遠何獨無遺澤者存顧視其詒謀之
道何如耳自海陸大通互市局啓商於國家關係尤鉅
萃吾國之英豪極力與外人搏猶恐不勝况以下駟當
之乎此烏可輕視也故今日之商國家重之眾人重之
爲商者益宜自重重之道如何毋矜習術而見利忘義
毋執己見而一成不變毋席豐厚而身參體忤循乎正
大之軌擴其遠到之識去詐去僞公溥爲懷以復我敦
厯之舊俗庶幾民康物阜國勢乃蒸蒸日上商之職志

當在是已雖然此未可爲常人道也星北宅心既厚有才而不自恃重公誼而淡私利春容大雅與道大適意可以爲商人標準者其在斯人乎故敢以此說進之所願星北持以定力老而彌篤壽一身兼及一世余鄉人也尤願星北薰德善良使海濱蕞爾邑人才勃興風俗醇美駸駸乎上媲鄒魯餘澤之所留豈獨一家已哉星北儻以我爲知言而歡然進一觴乎

虞君澄齋墓表

吾鄉固多嶽奇磊落之士龍山尤扶輿磅礴鬱積之氣

卷二

三四 四明叢書

約園刊本

之所薈萃代產英豪虞氏一門尤號多材往往不階尺土不一二十年事業鼎盛名滿海內外君其一也君名成渭字澄齋浙江鎮海人世居邑之靈緒鄉龍山頭至國初始徙居邑城康熙朝有諱二球者官提學君之遠祖也考守仁妣周氏君生三歲丁紅羊之厄隨父母奔避不幸離散賴女兄提攜伏處鄉僻因而獲全家故貧也至是益困十歲就傅頗勤學暇輒拾薪捕魚藉佐饗殮年十六因貧輟學叔父某挈至滬北某肆寄居廡下肆主某一見器重俾入廁夥友之列執事必恪雖極勞

悴無懟容俸給所入悉以奉親不自私也年二十三丁
父憂二十五方娶婦孫氏君既練習商務適舊肆易主
重振其業君乃出貲合作生平志願至是稍發展矣年
四十四復遭母喪君夙具幹才且信用昭著外人聞名
皆欽仰之英商某雅重君才乃延爲經理君亦爲謀必
忠事無不舉未幾卽自樹一幟高飛遠舉不依傍他人
門戶矣持躬勤樸不嗜聲色旁無姬侍獨於義舉仗助
不少吝光緒某歲鄉里大饑輒捐數千金以活之邑城
火藥局災震及祖居君乃重新建築俾族人皆得安集

龍山舊有宗祠規模庳狹復出重金以擴大之遇各行
省水旱偏災及橋梁道路之不治者孤寡之無依者教
育之絀於常費者皆慷慨解囊不可勝紀生於咸豐七
年二月十四日卒於光緒三十三年八月初一日春秋
五十有一子和慶娶樂氏和康娶史氏和庸娶葉氏女
子子一適同里孫氏夫造物之生材亦不易矣什佰庸
眾中忽覩一英特超異之姿非鍾毓之獨厚何由得此
然使其有才矣而無其遇數奇不偶動與時違雖懷才
蘊奇亦終老田閒已耳如君者有其才矣且遇矣使天

假之年凡所展布必更有大且遠者爲閩里榮爲邦家
光豈待問哉而靳之以壽年僅五十此余所以重爲君
惜也

奠從弟竹書文

憶弟始生王父健康少余五歲嬉戲一堂伯父卽世孤
苦堪傷余奉父命學不可荒挈之京邸攻苦螢窗學成
歸試名列膠庠硯田歲惡謀食不遑惟胡惟鄭作宰蘇
常延弟佐治黽勉匡囊才猷練習乃著聞望漢臬會館
四明同鄉弟爲之主和協眾商商旣翕服名益遠揚金

融操縱厥惟銀行自漢自滬興業迴翔交通之設隸屬
中央孰主宰是昔張今梁弟爲之長相得益彰領袖公
會冠冕商場全國聯合百鳥依風弟固多材性尤慈祥
爲民請命屈膝豪強和平呼籲翼挽猖狂皈依佛祖一
瓣心香虔奉訓諭勉爲善良非墜迷信求免災殃沈疴
忽染上膏下肅三月牀褥痛苦備嘗羣醫束手諸兒倉
黃余視弟疾形神影喪略知心事欲慰無方圖報知己
奢願難償公私交迫誠恐惶溘先朝露遽筮歸藏嗚
呼吾弟有存有亡人生寄耳駒隙過光令名自在雖死

何妨獨悲余老髮蒼視茫欲歸不得出門偃偃而今而後益復淒涼弟苟有知情豈能忘靈輒將發傷心摧腸何以奠之桂酒椒漿尙饗

題孫文愨公書客座私祝

古今兼三不朽者明有王文成清有曾文正曾文正之家訓家書王文成之客座私祝皆教子弟之言可見功蓋天下名滿天下特時來則爲之所私心願望者賢子弟耳夫世有賢父兄乃有賢子弟惟子弟轉瞬卽爲父兄是在爲子弟者以受之父兄者還以詔其子弟然後

賢父兄賢子弟乃遞嬗而不窮年伯孫文愨公嘗手書文成客座私祝以詒其長君慕韓慕韓率循惟謹入此歲來年六十有二矣因重付裝池畱示子孫冀垂永久慕韓其知此意矣喬木世臣之裔過庭詩禮之傳門承通德代有達人吾於孫氏見之還爲孫氏期之

題孫文愨公山水畫卷

因陋草堂圖同治乙丑年伯孫文愨公爲其友顧湘蘅太守作文愨畫不苟作故流傳絕少長公慕韓輾轉得之屬爲題記猶憶往歲次公仲嶼監督浙海關樞政駐

節甫上一日出示山水畫冊余一見卽指爲戴文節眞跡細審款識始知爲文愨手繪當時頗訝二公所畫何以如出一手今詢之慕韓乃知文愨少時學畫嘗師事文節淵源所在固不獨生同時居同里已也文節名重畫不易得文愨尤視文節爲罕手澤所存宜賢昆季倍加珍惜也

題孫文愨公書楹聯

曩見鄧友某得鄉先輩宋樗寮張先生卽之殘字集爲聯語懸諸座右輒歎鄉後學愛護昔賢遺墨如是其謹

也年伯孫文愨公嘗手書楹聯以貽其長君慕韓遭亂僅存其一慕韓乃施以裁翦裝潢成卷其珍重手澤之意宜其視尋常爲有加尤以見賢子恪遵彝訓但得一言輒永矢勿諉有如是也

倉基陳氏翰香學校記

吾鄉濱海置郡俗尙懋遷同治光緒間由商業起家眾論翕然尊爲泰山北斗者厥惟稻笠陳先生先生見義勇爲於地方善舉率作興事動底於成邦人士實利賴之顧尤留意於教育謂人生非讀書無以養成才識何

所資以供世用因所居近傍日湖乃勅設日湖義學因
先世醒齋公墓在小溪定山橋乃設定山義學凡爲孤
寒子弟就學之計靡有不周時科舉未廢乃於省城設
鄞縣試館爲鄉試士子息肩之所於家設紹科祀積儲
常款爲子孫應試之需念先世自莊靖公以降三十餘
傳世有聞人高曾祖三世皆身列膠庠詩書之澤累葉
相承擬構書室若干楹顏曰翰香家塾俾後世子孫顧
名思義誦先人之清芬永永勿替會病革事未果行伯
子子芹君乃假日湖義學傍舍先行延師授課以副遺
命子芹君下世叔子子泉君復相地於閩門之左構屋
四楹實行先生之志子泉君之經營翰香也實命猶子
蓉館助其規畫蓉館以國家旣廢科舉改設學校凡先
人所畱貽關於科舉款項分應移作校費自主校事知
學校經費大於私塾倍蓰又歲增無數學童費益不貲
蓉館旣勉力擔任之又以西齋迫狹乃割牆外己產以
裨益之又念九世祖克毅公遺有天朝師相飛蓋園古
址鞠爲茂草乃商之宗老酌量取裁撥爲校用歲在甲
子校舍不幸遭燬蓉館乃建議曰翰香學校之基本金

余已別有籌措可持永久今新築校舍於教科欲求適當計非拓地不爲功飛蓋園基址昔所未及購置者年來已盡屬余願捨以相助計鳩工庀材共費白金二萬餘圓於是翰香學校之規模乃燦焉大備迴憶子芹君之經始締造也距乃父之歿蓋二十有七年更閱二十有五年蓉館乃落成新校增其式廓距乃祖之歿已五十餘年矣兩世拳拳遺訓未敢失墜語有之莫爲之前雖美弗彰莫爲之後雖盛弗傳陳氏祖宗之宏願發起於前子孫之孝思繼承於後是皆不可以無記者也抑

余竊有感焉余自光緒乙未由京師假歸頗注意學務時浙江行省尙未有學堂也吾郡中學之初設余爲之物色教師爲之籌畫常費爲之建築講舍名稱屢易事實不更今南郊第四中學校是也方勗辦之初老師宿儒交相詬病余絕不置辯自時事變遷余亦馬齒加長厭倦世事於鄉里學務置而不問久矣蓉館亦舊時科舉中人也迺能上繩祖武下啓後人再接再厲氣不少衰雖揮斥多金亦所不吝以視余知難而退其勇怯爲何如耶易曰貞固足以幹事蓉館當之無愧色矣用是

益歎陳氏世澤縣延代產英豪爲閩里光固不可企及也

陳季生君家傳

君諱家鑑字季生陳姓鄞人系出宋文介公禾大父諱安塘考諱庭椿君幼而聰異畱心典籍未幾屏去儔書習計然術天性肫篤事親恪循孝道少時偶有過母氏欲撻之雖戰栗不敢避或詰之曰避則母益怒甚且以鬱憤傷母體是重得罪於吾母也故不敢比長有四方之志欲練習世事增長識見光緒某歲豫章某司馬官

齊園廣集卷二

三十四明叢書

約園刊本

浙中禮聘爲幕賓深資贊畫逾年丁父憂歸以病未嘗藥歿未視舍生平引爲至戚服闋偕某刺史與辦湖南電線內地風氣未開功輒不就君雖歎喟無如何也時前所佐某司馬已擢安徽巡道飛書招君往比至而巡道遽遭彈劾落職君於是亦浩然歸矣歸後頗畱意航業擬由鄂之鸚鵡洲行駛汽船直達巴陵事甫集而爲人牽率致敗折閱甚巨時慈谿嚴筱舫閣學旅滬最負時望以外商經理火險招攬寢廣吾國人無籌議及之者歲溢金錢不可數計思有以抵制之乃勅設保火險

事業出納之數動盈百萬延君主計壹以委之其破信
任如此君秉性慷慨戚友以空乏告周之無少吝尤篤
於本根既爲大父母營葬念叔父母尙在淺土亟治兆
域爲之合窆曰如是心始安也暇輒濡毫吮墨爲怡養
心神之助書法絕工上規逸少持縑素以請者踵相接
也晚年耽心內典常趺坐蒲團藉資靜攝卒於乙卯年
某月某日春秋七十配何夫人先君數年卒子五人學
濂學漢學海學溥學源女子子一適李孫三人思堯思
舜思聰

舊史氏曰吾鄉濱海建郡俗尙懋遷故經商者居多數
夫四民皆不可以不學豈商也而獨異乃耳濡目染爲
商者若舍計學遂無可以爲學者毋亦拘墟之見歟陳
君起家商業旁通藝事淵雅有士君子之行儻所謂庸
中佼佼者耶易曰同聲相應同氣相求巖閣學固兼長
翰墨者其見賞也宜哉

養園臆藁卷三

鎮海盛炳緯省傳著

題施丈雪船採芝圖小影二首

癸巳江甯試院作

江皋迴轡卸征衣一賦歸來悟昨非海上仙人原不死

漢陰老父久忘機初陽亭館花枝媚清露園林草甲肥

聞道黃公遺躅在

黃公鄞人居
邑之黃古林

商山高致古今稀

披圖忽感宦遊人鴻爪東西託跡頻十載登朝猶小草

三年從事此勞薪寂寥朋舊音書闕夢寐家山笑語親

何日相從林下去長鏡三尺倚閒身

養園臆藁卷三

一四明叢書
約園刊本

代伯兄醉六挽林雪帆親家四首

西風一夕訃音傳歎息斯人正壯年友到知心偏易死

醫雖國手詎回天豫凶我怪綢繆早慎疾君愁賦畀偏

君少體弱留意調攝遂精醫理自謂
四十後當死衣衾之屬皆其夙具也纔送方回安窆笱

歸來重復哭逋仙

余於八月二十七日送方翁夫妹
塢安葬連次日歸家而君歿矣

童童桑蓋蔭青春衡宇相望此卜鄰豈但交遊聯伯仲

還應嫁娶擬朱陳

君以女許字翁猶子吾
弟擬以女許字君子

八年相見無

虛日每事爰誠不厭頻此後蕭齋好風月流連鶻詠更

何人

九流旁涉百家通才大槩槃用不窮論究傷寒張仲景
法詳安命李虛中竹頭木屑經營細射覆彈棋賭賽工
尤喜堪輿能辨惑瀧岡吾賴葬崇公

甦耗秋風八度過名心到死未銷磨論文不肯清真旨

登第難輕甲乙科珍重槐黃來歲約

君約余明年同作
赴省而今已矣

淒涼薤露數聲歌鳳毛幸有佳兒在勉誦清芬望實多

挽金翁鏡英二首

允升同年之封翁

河汾學派兩家宗曾共先人負笈從

公與先大夫同受
業於外王父王公

琴史痛矣靈椿今拱木歲寒枯到後彫松

琴史痛矣

一四明叢書

約園刊本

鄭度屈就廣文官聊慰高堂意亦歡祿養竟難酬夙願

恩惠捧檄太無端

允升同年選教諭因
公疾篤不及赴任

壽江年嫂王夫人七十

十歲試有司邂逅遇江子逮爲同年生往還由茲始頗

聞中饋賢系出琅琊氏鹿車屏鉛華燕寢承盤匱酒漿

調八齋縫紉疲十指夫婿人中英跌宕通文史一試捷

春官學優乃筮仕秋曹凜比霜花縣燦成綺詎以翟菲

榮易斯荆裙美康吏不可爲達人貴知止仲卿念牛衣

靖節歸栗里苦荼久已甘式穀庶幾似丸熊課佳兒文

譽皆鵲起庭階蔚蘭芽含飴娛暮齒宿草感歲深紗幔
瞻尺咫登堂祝千春有酒多且旨

壽趙姻嫂裘夫人七十二首

記同夫婿逐名場文讌流連歲月長假館芝蘭叨入室
談心風雨共連牀盤飧屢拜僖妻惠眉案嘗聞德曜莊
回首前塵增悵觸故人墓木已成行
彤管芬芳眾口傳母儀鍾郝兩無愆布裙樸素畱家範
堂構辛勤勛後賢不解飯依資佛力只憑慈惠養天年
城西舊是經行地鞠脰登堂讓我先

卷三

二 四明叢書

約園刊本

和張鎮峯五世稀古詠四首

廿年不見歸靈光風送瑤箋到草堂
曩因修理費宮募捐書院諸生膏費

與君周旋最久潘岳陸機家世舊由來述德重文章

一門稼穡詩書澤
湘鄉太傅論古今世家分稼穡之澤詩書之澤君家殆兼之五福

康寧壽富鍾莫道古來稀七十高曾先導子孫從

後起英才蔚箭金東瀛歸後職農林
令子杏晴現官農部僉事誦芬

世有傳人在食舊無忘佑啓心

吾家耄壽慶蟬聯猶憾靈椿溢露先
高祖王父曾祖王父壽皆八十五王父

壽七十三惟先一樣粉榆舊里社獨教霞浦聚羣仙
觀察壽五十九

張公權之尊人潤之先生暨德儷劉夫人六秩雙
壽

林下優游矍鑠翁高風桓孟古今同活人方術扁倉著
傳世文章軾轍工詩譜笙咳春盎歡騰飴室樂融融
齊眉合共增眉壽仙樂琅璈曲未終

壽周个亭五十

陳華浦水流渺瀰中有周君信佳士世德淵源崇積累
恂恂持躬敦踐履分財贍人無彼此仁粟義漿徧鄰里
杜陵廣廈拓基址負笈莘莘來學子置譯通賓時倒屣

蘇州府志卷三

四四明叢書

續開刊本

投轄陳遵差可擬信手揮毫常滿紙餘事丹青傲畫史
人生富貴自今始老氏知足復知止采菽中原式穀似
梧竹蘭芽紛蔚起天假之年介繁祉彼何人哉園與綺
題質宋唐僧裝趺坐圖二首

淵源儒釋兩家通塑坐將母面壁同收拾此心腔子裏
六根都淨六塵空

風雲慘淡戰爭延我佛慈悲見亦憐安得大裘同白傅
普天穩坐一蒲團

節孝張母馮淑人七十壽四首

張筱雲道尹之媿

姑射仙人冰雪姿來歸名族協坤儀羹湯諳習姑章性
珍重雞鳴問寢時

彩鸞舞罷鏡生塵秋雨孤燈暗苦辛祇爲高堂強言笑
此心誰識未亡人

升堂致敬伏波賢感念鵠原奉事虔臺築懷清光綽楔
旌褒降自九重天

古稀年屆未龍鍾鞠膺登堂式女宗天爲大家彰晚節
貞心畱作後彫松

沈君燮臣爲子納婦翌日爲母楊太夫人稱觴祝

壽

五十四

約園刊本

七秩壽賦此奉賀

仙樂琅玕次第陳婺星躔與壽星鄰門閭清遠吳興地
風物暄妍上巳辰弓冶後賢傳業舊羹湯少婦入廚新
子生孫復孫生子笑舉瓊卮不厭頻

壽陳少石同年

長安紛似奔尙有子遺民治績畱惇史功名付後人湖
山供湯沐書畫助精神天許劉樊侶優游歲月新

陳君琴舫八十壽

纔斟蒲酒過端陽又捧香山介壽觴自昔太邱尊碩德

卽今魯殿仰靈光夢回桑海煙雲幻老去林泉歲月長
天與清閒增晚福期頤大耋正難量

壽李寶裕七十

極目晴霄秋氣清壽星移向析津明庭階蘭玉青蔥色
里社枌榆繡繸情人到醉鄉無老境天資晚福有餘生
團圓璧月光猶昨邀入君家舉兕觥

壽詹母鄭太夫人八十

國家推算窮舟車精密曾無毫釐差詹尹在官慎乃事
輿情悅懌無怨嗟側聞仰承慈母訓解除苛嬈毋斤斤
行役常憐子季勞望雲卻思親舍近條風入律春光新
介眉有酒尊罍陳養堂嬉戲萊子老館室迴翔八龍荀
歡聲雷動達雨水齊祝歲蕤介繁祉臨民久欽崔母賢
作頌載賡魯侯喜

題明遺獻辛克羽先生遺像

世事變滄桑士夫墮氣節奄奄非一朝誤人由學說乾
嘉盛考據蟲魚箋瑣屑菲薄性理家講學遂中絕末流
益加厲綱常竟破裂緬懷明季世薦紳樹風烈緹騎紛
南來報君惟碧血邨鄒鼎已陳魯陽戈未撤追維提倡

功東林高幟揭端文有高第辛公人中傑寒香遺著在
冷若嚼冰雪辭徵表素心淵明腰肯折明社久已墟斯
文今不滅文孫擁皋比講舍仍故轍循流當溯源廢食
毋因噎名教洵大防禮法豈虛設爲語魯諸生仰止鄉
先哲鯁生瞻泰斗瓣香心欲熱錫山高崔巍光照東西
浙

謝君蘅臆於梅墟故鄉勗設求精學校已屆廿載
賦此以紀

謝公作事益求精兩字顏爲學校名業戒荒嬉韓吏部
化行絃誦魯諸生眷懷桑梓將蒸敬樂育菁莪盼俊英
八百孤寒成立地廿年特爲苦經營

挽費冕卿

知交落落似晨星又送長房入杳冥俯採芻言容箸借
頻移玉趾枉車停解紛只恃誠能感拌死能消禍已形
井里幸安耕鑿舊當年鋒鏑隻身經

洪潛菊先生暨德儂鄭夫人七秩壽

忠宣胄系衍吾鄉北海迴環大隱藏妙解醫方參仲景
偶張藥肆慕韓康身因學道翻增健家有傳人信必昌

二老婆娑且行樂眼前梧竹蔚成行

壽趙芝室五十

豪情湖海一元龍誼託葭莩
挈把臂從中令家聲垂宋室
季隨人望仰姬宗水邊沈李澄
懷寄門左懸弧舊事逢
座客常盈孔北海爲歡應盡酒千鍾

壽魏伯楨五十

漢唐律法費研求況復東瀛考察周
里社枌榆尊宿學
門牆桃李廣從游同心健婦鴻光耦
繞膝諸郎軾轍儔
富貴人生成底事澄清素志儻能酬

壽馮保魯八十

八四明叢書

約園刊本

壽馮保魯八十

多少朋簪半古人是翁矍鑠尙精神
每聞好事流傳徧
爲勸加餐宴飲頻弓冶佳兒傳業遠
羹湯少婦入廚新
春秋此後曾無極始信人間有大椿

壽陳星白七十

兩世論交五十年季方踵武太邱賢
窮經澤守蒲編舊
發解名標蕊榜前不露圭稜惟退讓
廣蒐文獻待流傳
書家文董開先例翰墨常爲毫盞緣

張仲玉廳長出示先德蘿薌先生小瀛洲圖囑題

率成二絕以應

秦王得士豔登瀛一樣掄才藻鑑精儒吏風流循吏績
滿栽桃李答昇平

涉歷名場廿五年

余於同治庚午始應北闈鄉試光緒己卯試浙闈獲售甲午監臨江西鄉

闈嗣是十年而科舉廢矣

白頭宮女說開天槐黃無復忙時節掩卷

尋思一惘然

挽洪復老

同是殘年衰朽身蘭言相對白頭新窮愁身世愛門戶
傲岸胸襟遠俗塵短榻書橫聊徙倚滿庭花發總精神
蓬廬老去辛勤有日暮空懷抱膝人

蓬廬集卷三

九四明叢書

約園刊本

蔚堂先生兩莅吾邑循聲卓然屬時會艱難頗有

善刀而藏之意鑒士民愛戴之誠未能決去暇

日出示聽松亭餞別圖蓋卸任蘭谿時都人士

畱爲紀念之作率題二絕旣述感情兼申維繫

無數甘棠美蔭連蘭谿移植到蛟川不須遠訪樂公社

竹馬兒童看著鞭

淮南舞袖礙回旋如此長才奈地偏嶺海風波行不得

陶公莫漫賦歸田

林孟垂世講五十初度四首

舊業城南族望崇，英聲早歲動巒宮。十年春夢槐黃節，半世生涯竹素中。時事神州秦失鹿，故人京國楚遺弓。功名脫屣由來久，小隱淞濱作寓公。

牙纛高懸上將臺，滁州雅量獨恢恢。誦絃愛子握衣侍，倡和賓僚把琰陪。躡蹻記從瀛海返，投戈爲勸講堂開。門牆桃李饒春色，憶否當年著意栽。

誰把黃金禮郭隗，爲君彈鋏賦歸來。卅人功苦窮探穴，幕客文豪富取材。八月驚濤枚叔筆，萬言倚馬謫仙才。欲酬知己無多願，試嚼餘甘味美回。往事西河感曷窮，謝階猶喜綠蔥籠。盤桃近接西王母，帶草新繁鄭小同。菽水有餘心已足，簡編尋味腹常充。負薪翁子奚須羨，愛日庭前樂趣融。

挽俞雲蓀

卅人職業苦經營，令子才高冠眾英。愛日庭前餘至樂，望雲天末寄深情。西風砭骨寒生慄，南極韜光慘不明。耆碩凋零增百感，回瞻粉社淚先傾。

題袁履登白首娛親圖二首

人世塵勞未許捐，幾莖白髮上華顛。畫工狀我孩提態，
忘我侵尋日艾年。

善氣當爲福澤緣，一家涵泳太和天。子輿三樂談何易，
獨有袁絲似已全。

君秉性光明磊落，雙親具慶。友于綦篤，曾任大學校長。

題徐仲麟課子圖

不假畱貽金滿箴，丹山雛鳳自聲清。新居爽塏吾能說，
早已安排晏子楹。

壽蔣東初六十

重陽節近菊花天，甲子平頭六十年。北海樽開嘉客座，

卷三

十一四明叢書
約園刊本

南天弧曜老人躔，一門儒雅源家學。吾黨風流屬寓賢，
書畫怡情宜養壽。香光徵仲許齊肩。

袁燮元先生八秩孤慶暨德儷，胡夫人六十雙壽
天生令器抱奇尤，伐木聲中好友求。聞道蘭陔能孝養，
漸臻蔗境樂優游。駟門將大由陰德，萬石同尊少匹儔。
仙侶劉樊相視笑，一庭愛日已千秋。

挽董淡生

天邊光黯少微星，去去鸞驂入杳冥。我佛當前心卽是，
人閒何世夢方醒。墨花浮動餘殘草，酒盞飄零賸渌醅。

十載蒹葭叨倚玉暮雲迢遞緬英靈

挽陳子秀三首

西流一水繞城隅二陸東西列宅居
看取萊衣齊拜舞華堂方展紫瓊璠

忽聞小極已經旬猶冀刀圭著手春
爭奈膏肓逢二豎雁行忍別友于人

論交伯仲並苔岑暇日追陪惟素心
只道長公尤健者誰知八月竟凶臨

挽謝母王太夫人二首

卷三

十一四明叢書

約園刊本

肅拜登堂閱歲年神仙福分佛因緣
彌留猶發慈悲願軫念窮簷飭貸錢

豫章石炭證前聞繼述良由詔誥勤
難得南州徐孺子

表章歐母有鴻文

義寧陳伯嚴氏新著謝君夫婦合傳敘述太夫人嘉言懿行至爲詳確

壽徐積夫七十

南州高士舊家風發跡原由吠畝中
願割腴田讓同氣肯興鄉校養童蒙
新陰梧竹情懷慰晚景桑榆樂趣融
稼穡澤堪詒百世善人獲福正無窮

朱姻嫂汪太夫人七十祝且

如射仙人冰雪姿
琦璜飭度肅坤儀
望夫慘淡貞松操
教子殷勤式穀思
列戟門庭光綽楔
早梅時節介香醅
一編瀟碧清吟在
欲頌南山愧屬辭

題黃涵之道尹先德春甫先生遺照二首

活人妙術擅岐黃
戶限常穿應接忙
聊借濠梁資憩息
一竿遙指水雲鄉

令子循聲徧浙東
秉承家教播仁風
披圖想見汪洋度
活潑襟懷自昔同

壽謝衡牕五十四首

香齋集卷三

十三

四明叢書
約園刊本

舊家門巷認烏衣
壯志鵬搏矢奮飛
涉獵儒書能見大
經營卜產妙探微
范蠡致富雄才負
郭解輕財眾望歸
仰託北堂萱蔭茂
卜君長此荷春暉

碧瓦朱甍數尺題
齊雲臺榭矗天梯
春波畫舫鄞江北
秋月疏林歇浦西
百丈地衣紅靺鞨
千枝燈火綠玻瓈
只緣博得慈顏喜
五色紛綸任目迷

邨超愛士廣牢籠
談笑能生四座風
珍重報瓊儀物備
聯翩躡履館餐豐
東坡棋局何須勝
北海樽罍總不空
碧眼虬髯同一醉
多君常作主人翁

黍谷春回日漸長華堂初啓錦屏張鳳毛自是君家物
燕喜新成魯國章瑜珥瑤環洵美秀金漿玉醴並芬芳
鄒枚授簡多佳什才盡江郎愧莫當

壽陳蓉館五十

休將迂闊謂吾儒自有槃才與眾殊書記阮生工筆札
算經孫子析錙銖涼生松徑人增健酒入荷筒客盡娛
百歲光陰方半世願君努力事前途

洪君滄亭示余三茅十景詩紀賦此以志嚮往二
首

卷三

十四 四明叢書

約園刊本

忠宣世澤衍明州代產賢豪邁等儔記取壽封橋迤邐
半爲行路半箕裘

大陸風雲俶擾秋故園東望路悠悠十洲三島皆零落
獨向三茅賦夢游

挽嚴漁三四首

黷宮蚤歲擷芹先詬耗秋風嬾著鞭到處爭迎珠履客
元瑜書記自翩翩

滬濱議會借才多百業殷盈人網羅擘畫周詳資一手
十年精力柰銷磨

湖山勝處卜菟裘嘯傲煙霞夙願酬如此名區天亦妬
病魔經歲不曾休

延秋吟館一鐙昏遺藁淋漓漬墨痕定有哀音生楚些
美人香草與銷魂

挽張子淵親家四首

故鄉輕去鬱情懷戚好無多契闊皆亡憶城西秋月皎
年年相對是天涯

賤息舒祺愧不才冰清幸接荷栽培學成聊復謀升斗
幾見摠衣撰杖來

卷之三

十五

四明叢書
約園刊本

曼卿此去主蓉城風信遙聞舉室驚差幸箕裘傳緒早
鳩桑養子總均平

蒼茫東海正揚塵大陸難藏七尺身地下尙畱乾淨土
卻教穩臥了遺民

翰香學校新校舍落成兼祝陳稻笠先生百齡誕

辰紀念

翰香名塾始何年願誦清芬勵後賢令子肯堂經始亟
文孫繩武告功全搜羅金箭英才蔚鄭重經籙世澤延
廣廈萬閒誰發軔太邱碩望古今傳

壽周星北六十二首

候澗山勢壯磅礴產奇才
縣衍灑溪派遨游郭隗臺
量寬能致富義重輒分財
每過枌榆社歡聲動地來
暫稅征人駕重申故舊情
東山棋局伴北海酒樽傾
梧竹標新翠桑榆愛晚晴
平分秋色好高會續耆英

廣瑤許先生暨德儷楊夫人百四十歲雙慶

脫離虎口贖餘生茶苦當年
龜勉情倒啖蔗逢漸佳境
後周松結歲寒盟人經浩劫
方知足家有英才始著聲
白髮齊眉百卅載古稀雙壽
一時并